


金石錄補續跋



跋續補錄石金

著 苞奕葉

編主五雲王

叢書集成初編

中華民國二十四年十二月初版

著者 葉奕苞

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

☆C六二七四

美

金石錄補續錄

近今金石文著錄作者如林。求其目覩碑刻款識精確可信。未有如潛研堂金石文跋尾。兩漢金石記也。葉九來先生著金石錄補。在錢翁二書前。以補趙德父之所未備。其書採摭甚廣。攷據頗精。末列集異。碑題立碑處。傳疑雜記。五門爲著錄者另啟一例。後附續跋若干卷。樹議迥出前賢。亦可補德甫之所未及。乃其家子孫不振。未能鏤版。書幾淹沒無傳。惜哉。錢遵王讀書敏求記云。葉九來著金石錄補。學識遠在明誠上。留蘊余處。將爲整齊其書。垂之久遠。然亦未能刻也。此書乃九來壻丹臣許君從原本抄出者。其子甚珍之。有題語在卷首。九來子札中有勿更假他人語故云。檢齋先生研究經史。好古若渴。其能寶藏此書也。宜哉。余因借錄一過。漫跋於後。以俟世之能刻是書者。可與錢翁兩家後先輝映云。

嘉慶十七年歲在壬申三月香嚴周錫瓚識

金石錄補續跋卷第一

崑山葉奕苞九來著

古器物銘

楚鐘銘
銅釜銘
甗銘
周陽家鐘銘
秦權銘
新莽侯鉦銘
商維鼎銘

楚鐘銘

楚之僭在王，而不在乎自紀其元。春秋書隱公元年，豈亦不用周之正朔乎？三代之時，侯國之爲史者，但書本國之年，而不書天子之年。春秋隱公元年者何？自魯人書之也。秦誓十有三年春者何？自周人書之也。以上皆顧亭林金石文字記中語，謹摘錄之。

甗銘

真宗咸平間，乾州獻古銅鼎，狀方而四足，上有古文二十一字，詔儒臣考正，而句中正、杜鎬，以爲史信父甗。考古圖云：好時令黃軫，獲是器以獻。句中正、杜鎬，驗其文。楊南仲以史字不必讀爲史，當作中。音仲，予按：墨子夏后鑄鼎，四足而方，則此甗爲夏商之器。當時人多以伯仲甲乙爲號，未常有史姓者。楊說近之。說文云：甗，甗也。

秦權銘

宋秘閣校理文同家有二器其一銅鑲上有銘循環刻之歐陽公云不知爲何器趙氏以爲秦權據班固律歷志五權之制圓而環之令之肉倍好者周旋無端孟康註錘之形如環也予按爾雅肉倍好爲璧好倍肉爲瑗肉好若一謂之環李氏云邊曰肉中空曰好邊大而空小璧也此之肉倍好者如璧趙氏引康註如環者誤

商雒鼎銘

宋劉原父得鼎于商雒其銘有云惟十有四月蔡君謨嘗問原父十有四月者何原父不能對呂大臨云古器多有是語或云十三月或云十九月疑人君卽位居喪踰年未改元故以月數趙氏云古人君卽位明年稱元並無踰年不改元之事呂說非也但古語誠有不可曉者予按史記代王歇二十七月齊王十月九月小司馬註云因舊月而數也如前鼎銘或因卽位之月數起故不稱某年其義亦易曉耳

銅釜銘

三輔黃圖長信宮漢太后居之太后宮在西秋之象也秋主信故宮殿皆以長信長秋爲名漢書天子之女下嫁不自主婚以公主之故曰公主亦曰翁主王曰王主侯曰侯主天子之姊妹爲長公主外戚傳文帝立數月封竇皇后女嫖爲長公主顏師古曰年最長故爲長公主然則顏之說自父封之也姊妹皆得稱長者兄弟封之以別于己之女也歟魏徵云皇帝之姑姊爲長公主皇帝之女爲公主是也

周陽家鐘銘

漢表趙兼以淮南王舅封周陽侯。田蚡傳弟勝爲周陽侯。按太子稱家。故公主亦曰家。如館陶家。平陽公主家。是也。侯亦曰家。如衛青父鄭季。以縣吏給事侯家。是也。此曰周陽家。未知爲誰氏之鐘。呂氏考古圖有周陽侯甗。可知周陽家卽周陽侯也。

新莽候鉦

洪氏隸續止釋候鉦重五十黍斤。黍字爲七字借用。而不言候鉦所出。按考工記。鳧氏爲鐘。鼓上謂之鉦。註云。鼓者所擊處也。鉦在鐘腰之上。鐘體之正處。采芑之詩有鉦人伐鼓。註云。鉦音征。鐃也。鐃也。鼓以動之。鉦以靜之。鉦與鼓各有人焉。則鉦另爲一器之名。而周禮鼓人以金鐃節鼓。以金鐃止鼓。又若鼓人所執之物。與采芑之詩互異。此云候鉦足以證鉦人有專司矣。說文云。候。伺望也。鉦。鐃也。似鈴。柄中上下通。博古圖有周雲雷鉦。其形似鈴鐸。有柄。可以持而擊之。

金石錄補續跋卷第二

漢王稚子闕銘

漢國三老袁君碑

漢西嶽石闕銘

漢北海相景君碑

漢北海相景君碑陰

漢敦煌長史武斑碑

漢司隸楊厥開石門頌

漢平都侯相蔣君碑

漢孔子廟置卒史碑

漢孔德讓碣

漢孔君墓碣

漢韓明府孔子廟碑

漢州輔碑陰

漢郎中鄭君碑

漢丹陽太守郭旻碑

漢王稚子闕銘

右考漢書本傳云。舉茂才。除溫令。遷兗州刺史。後徵拜侍御史。永光二年。從駕南巡。還爲洛陽令。註從溫補洛陽令。與傳異。漢人樹闕。歷敍官閥。不能盡載。則更立一闕。如太尉劉寬是也。洪氏載此闕爲河南縣令。而辨其卽溫令。以河內乃郡非縣。溫爲河內之屬邑也。

漢國三老袁君碑

右袁君碑云。諱良。字厚卿。陳國扶樂人也。子光。博平令。騰。尙書郎。璋。謁者。孫衛尉滂。司徒掾宏。趙氏。洪氏。歷辨袁安與滂非從兄弟甚詳。予謂安傳。與此碑官閥年代較然。不必辨也。碑云。良。歷郎中謁者。將作大匠丞相令。廣陵太守議郎符節令三老梁相。以順帝永建六年卒。安傳。祖父良。平帝時爲太子舍人。建武初。爲成武令。卽史或有遺漏。何不同至此。況安薨于明帝永平四年。豈有其祖之卒。反在後七十一年。趙氏云。在後三十九年者。亦誤。蓋永平四年辛酉。而永建六年辛未。已兩易甲子也。安子京。京子彭。彭次子逢。在光和二年三月。以司空免。而滂之免司徒。亦在此月中。豈有與從曾孫同時在三公之位。又彭之孫閔。二弟忠。宏。豈有與從高祖父司徒掾同名之理。始知安滂之祖。名姓適相同耳。至于水經之袁梁。以此碑之梁相而訛。袁幹之爲貴鄉侯。卽此碑之遺鄉而訛也。姓纂姓苑諸書。率多附會。何足深論耶。

漢西嶽石闕銘

北涼王沮渠牧犍。國主王璘。皆稱永和。不止漢晉後秦而已。

漢北海相景君碑

右景君碑。隸後亂曰。宜參鼎鞬。洪氏云。字書無鞬字。當作拂解。按漢隸多通用。如紱亦作紕。此鞬字應作鞬。鄭氏曰。山行曰鞬。取封土爲山之象。以祭道神也。蓋喻景君之德望重如鼎。高如山。宜參云者。應在台鼎之位。樊敏碑。模楷後生。宜參鼎鉉者是也。

漢北海相景君碑陰

漢書循行。此碑作脩行。都少卿穆曰。後漢書皆出傳錄。以修爲循者。特傳錄之誤耳。趙氏不信碑本。而信漢書。且引晉書爲證。不知晉書修于唐。乃仍漢書之誤。而云循行也。予按孝景將侯王氏。脩侯犯色。師古曰。修音條。地里志。勃海郡修市。應邵曰。修音條。修條字畫相類。亦致訛謬。則循脩二字。其因字畫傳寫之誤無疑。兩漢官制。郡國屬吏無名午者。河南尹員吏有百石卒吏二百五十人。碑稱故吏。列于書佐後者。卽此卒吏。或謂午字乃卒字之訛。予曾至景君碑下。詳審午字。並無剝文。都少卿金薤琳琅。釋此碑陰姓名。遺行義劇張敏字公輔。故書佐劇_{下二}字疑字伯度。而台丘遷。則誤爲呂立遷。何也。韓敕碑有行義掾。不知爲何官。不稱故者。惟敏耳。古人命官。多因前代表志。或緣其名。或用其義。因憶前書註。漢官典儀職云。刺史周行郡國。以六條問事。安知不以條行爲官名。其職主于察治耶。條侯條市。皆誤爲修。則此或從條字。

而說未可知也。趙氏以台丘爲複姓之奇。碑又有水丘郎字君石其姓亦僅見爾。下又云行三年服者凡八十七人。漢自文帝短喪之後苟能斬杖執禮者碑中必特書之。此以親喪之戚施于景君似乎矯情踰禮。失先王緣情之制。或師資之間心喪三年服不忍采而已。非必寢苦啜粥爲也。

漢敦煌長史武斑碑

碑中有金鄉長河間高陽史恢銘詞後有尙書丞曹芝成武令曹种豐令徐崇陳留府丞名闕防東長名闕書此碑嚴祺字伯曾小歐陽云字伯魯集古錄謂氏族州里官閥皆不可見趙氏一一證以爲皆備洪氏謂立碑者六人而不及書碑之人蓋嚴祺在六人之外又明言書此碑在上文予特拈出使之有聞于世祺視六人不書秩里而獨字之必處士之同里閭者也秦置郡守景帝中二年更名太守凡郡有丞至唐始以大州爲府後遂以府易郡兩漢領縣者非國則郡如陳留之丞宜曰郡丞而此碑曰陳留府丞武斑之父開明碑除吳郡府丞高頤碑蜀郡北部府丞

漢司隸楊厥開石門頌

予讀鄧騭傳時遭元二之災人士荒饑死者相望章懷註元二應作元元竊疑文人好奇比之陽九百六宜作元二本文直指永初元年二年災害爲是卽此碑云中遭元二西夷虐殘亦見於騭傳而洪氏先得我心疏辨詳悉又引王充論衡元二之間嘉德播流與此碑皆卽位之元年二年義尤確切善讀書者不以辭害志願以平白曉暢之語轉爲傳會之解所不取也碑中有厥字孟文故歐公與趙氏俱曰楊厥水

經註云司隸楊渙與字孟文合。

漢平都相蔣君碑

蔣君歷郡五官掾。曹再爲計掾。出宰豫章平。平都侯國。屬豫章。平字下必都也。趙氏所收。豈盡殘缺。而云不可考耶。洪氏辨蓼儀卽蓼莪音義甚詳。而此碑銘中有皇矣上帝。賦命不均。淑人君子。胡不萬年。作你鈞切。與詩正是國人。胡不萬年同。漢書敘傳。封禪郊祀。登秩百神。協律改正。享茲萬年。韓詩外傳。往而不可返者親也。至而不可用者年也。其所本如此。

漢置孔子廟卒史碑

右碑。漢永興元年造。司徒臣雄。司空臣戒。請置孔子廟掌禮器百石卒史一人。書名不書姓者。以位列三公。皆知爲吳雄趙戒也。唐宋告身章奏署名。凡丞相不著姓者。類此。按范書百官志。東西掾四百石以下。秩比命士。爲百石屬。其後辟除。通爲百石。但司徒公下。凡祭祀掌省牲視濯。則有令史屬三十六人。司空公下。凡祭祀掌掃除樂器。則有令史屬四十二人。而無卒史之名。卒史見此碑。隸法與韓敕碑略同。而嚴謹過之。敘事簡要。尤爲近古云。

漢孔德讓碣

右碣。集古錄云。其名已磨滅。但云字德讓者。宣尼公二十世孫。都尉君之子也。趙氏亦作孔德讓碣。按德讓名謙。載孔氏家乘。都尉君者。宙也。宙七子。知名者謙、哀、融三人而已。融自有傳。哀之名見史晨碑。謙卒。

于永興二年。年二十四。又十二年。延熹甲辰。都尉始卒。記此碣者。必都尉也。其文字簡妙可觀。東家雜記云。碣在孔子墓林中。

漢孔君墓碣

右孔君碣。在孔子墓林中。其額題孔君之墓。文已殘缺。前有云。元年乙未。而元年上闕二字。趙氏以爲東漢惟桓帝永壽元年。歲次乙未。其他有三乙未。皆非元年。此碑當爲永壽時立也。按史。漢高帝元年。與昭帝始元元年。皆爲乙未。安知孔君非西漢時人。而趙氏竟以爲永壽鑿矣。

漢韓明府孔子廟碑

右韓明府修孔廟禮器碑云。明府名敕。字叔節。歐陽公云。春秋傳載古人命名之說。不以爲名者頗多。故前世見於史傳。未有名敕者。予觀繁陽令楊君碑陰。有故民程敕。字伯嚴。則漢時不獨韓明府名敕也。敕字本音徠去聲。今按二君之字。皆作飭字解。此碑簡古逸宕。爲漢隸第一。都元敬楊用修錄碑文。缺七字。而趙子函石墨鐫華本。缺五字。此多戲與二字。蓋先文莊公舊物也。隸釋載碑陰六十一人。右韓明府以下。涿郡太守魯熙。至相史魯周乾八人。則正碑非碑陰也。

漢州輔碑陰

右州輔碑陰。自漢陽太守而下。四十九人。故京兆尹延篤。叔堅居其次。趙氏云。輔一宦者。碑陰列數十人。延叔堅當代顯人。挂名于此。爲可恥。洪氏據碑云。鄉人姻族。相與刊石。稱邑者八人。延篤爲南陽隰人。不

稱邑。則知輔亦讎之人也。況身退窮約。同塵所以遠害。引陳仲弓弔張讓母喪。爲叔堅解嘲。予謂趙說乃理之正。洪說亦情之通。皆是也。內有小侯新墅。鄧辰伯臺。明帝永平九年。爲四姓小侯。開立學校。袁宏漢紀曰。外戚樊氏、郭氏、陰氏、馬氏諸子弟。號四姓小侯。以非列侯。故曰小侯。註引禮記曰。庶方小侯。亦其義也。桓帝建和二年。賜四姓及梁鄧小侯帛。則四姓之外。外戚子弟。皆得稱小侯可知已。第和熹皇后謙退。兄隲終帝世。不過虎賁中郎將。至安帝永初中。始封上蔡侯。弟悝、葉侯。宏、西平侯。閻、西華侯。不知辰爲誰之後也。至於州姓。必皆輔族。內則令丞郎中。外則守上黨。相細陽。與州從事縣令長。共十有三人。范書所謂子弟支附。過半于州國。奄寺之禍。惟漢獨烈。有由來已。

漢郎中鄭君碑

白虎通。巡者。循也。通作遁。晏子有云。晏子遂遁而對。管子。桓公蹴然遂遁。周禮司士註。遂遁既復位。儀禮士昏禮註。辟遂遁。音旬。漢平當贊。遂遁有恥。則遂遁卽遂巡明矣。項籍傳。亦有遁巡而不敢進之語。註作蹲。莊子蹲循勿爭。不可泥過秦論之註。而以爲一音也。玉篇。徒頓徒昆二切。釋退還。卽退讓之意。用本韻亦可。

漢丹陽太守郭旻碑

古人治經術。各自名家。小杜者。杜延年也。杜周明法律。延年爲周少子。亦明法律。周酷暴。延年行寬厚。最知名。此云治律小杜者。必延年無疑。

金石錄補續跋卷第三

漢孫叔敖碑

漢孫叔敖碑陰

漢冀州刺史王純碑

漢桐柏淮源廟碑

漢祝陸後碑

漢泰山都尉孔宙碑

漢老子銘

漢車騎將軍馮緄碑

漢竹邑侯相張壽碑

漢冀州從事張表碑

漢金鄉長侯君碑

漢衛尉卿衡方碑

漢中郎馬君碑